



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

იბერიის თემა

იბერიის თემა (ბერძნ. Théma Ibērias), იბერიის საკატეპანო, ბიზანტიის იმპერიის სამხედრო-ადმინისტრაციული ერთეული XI ს-ში, შეიქმნა კეისარ ბასილი II-ის დროს დავით III კურაპალატის მემკვიდრეობის მიღების შემდეგ. ი. თ-ში შედიოდა: იმიერტაო, ჩრდ. ბასიანი, ოლთისი, თორთომი, კოლა, არტაანი, შავშეთი, ჯავახეთი და ე. წ. „გემონი ქუეყანანი“ - არაქს-ევფრატის აუზში მდებარე ვრცელი ტერიტორია, რ-იც ეთნიკურად არაერთგვაროვანი მოსახლეობით იყო დასახლებული. მოგვიანებით ი. თ-ის შემადგენლობაში შევიდა კლარჯეთის ნაწილი, ხოლო კონსტანტინე X მონომაქოსის დროს (1042-55) - შირაქის სამეფო ქ. ანისით, რ-იც ი. თ-ის დედაქალაქად იქცა.

ი. თ-ის შესახებ ისტ. წყაროებში ცნობები მწირია. სტრატეგოსებისა და სხვა თანამედროების პირთა სია გარკვეულად ივსება სფრაგისტიკული მასალის საფუძველზე.

ი. თ-ის მმართველს ჰყავდა გადასახადის ამკრეფნი და თანაშემწეები სამოქალაქო და სამხ. საქმეებში. მ. შ. აღმ-ის დიდი დომესტიკოსი. რეგულარული ბიზანტ. გარნიზონის გარდა ი. თ-ს ადგილ. მოსახლეობის ჯარიც იცავდა, რის სანაცვლოდაც გადასახადისაგან თავისუფალ სახელმწ. მიწის ნადავლს ღებულობდა.

ი. თ-ს ჩრდ.-აღმ-ით ესაზღვრებოდა ქართველთა (საზღვარი ბანის წყალზე გადიოდა) და ვანანდის სამეფოები, დას-ით - ბიზანტ. აღმ. ერთეული - ქალდიის თემა, სამხრ.-დას-ით და სამხრ.-აღმ-ით - ტარონისა და ვასპურაკანის ოლქები. ი. თ-ის შექმნით ბიზანტიამ გაამაგრა იმპერიის ჩრდ.-აღმ. საზღვრები და შექმნა სამხ. პლაცდარმი სომხ. სამეფო-სამთავროებისა და საქართველოს წინააღმდეგ. ი. თ-მა არსებობა შეწყვიტა თურქ-სელჩუკთა შემოსევების შედეგად დაახლ. 1072-74. მისი ბოლო მმართველი იყო გრიგოლ

ბაკურიანისძე.

წყარო: არისტაკეს ლასტივერტეცი, ისტორია, ე. ცაგარეიშვილის გამოც., თბ., 1974; გიორგი კედრენე, წგ.: გეორგიკა, ს. ყაუხჩიშვილის გამოც., ტ. 5, თბ., 1963: Всеобщая история Степаноса Таронского, Асохика по прозванию писателя XI столетия. Пер. с арм. Н. Эмина М., 1864.

ლიტ.: კოპალიანი ვ., საქართველოსა და ბიზანტიის პოლიტიკური ურთიერთობა 970 - 1070 წწ., თბ., 1969; ნოდია ი., იბერიის საკატეპანოს დაარსება, «თსუ შრომები», 1974, ტ. 155 - 156; Степаненко В. П., Алексеенко Н. А., Фема Иверия в XI в. (по данным сфрагистики) «Античная древность в средние века», 2009, вып. 39.

ი. ნოდია
